



古今法書苑

六十七
六十八

112
49
36





418 符
49
36



古今法書苑卷之六十七

吳郡王世貞元美甫編 雲間王乾昌伯元甫校
十三之石 十三

唐郎穎碑陰題名

右郎穎碑陰題名柱國府僚佐三十二人常山公府
國官一百七人合一百三十九人為一卷柱國府長
史司馬掾屬各一人諮議記室司倉司功司尸司兵
司鎧司法司田司土參軍事各一人又有參軍事五
人行參軍十人典籤三人常山國官國令大晨各一
人常侍侍郎國尉各二人典衛六人舍人四人城局



廟長學官各一人食官廐牧各四人典府長一人典府丞二人親事七十五人頴以貞觀四年卒此蓋唐制也

集古錄

唐王悅等造像碑

貞觀六年正書無姓名

唐黃君漢碑

貞觀六年李伯藥撰正書無姓名

唐九成宮醴泉銘

貞觀六年魏徵撰歐陽詢正書

右九成宮醴泉銘唐祕書監魏徵撰歐陽率更書九成宮卽隋仁壽宮也太宗避暑於宮中而乏水以杖琢地得水而甘因名醴泉焉

集古錄

九成宮醴泉銘唐祕書監魏徵撰率更令歐陽詢書

按唐書貞觀中改隋仁壽宮爲九成宮永徽中又改爲萬年宮宮在岐州開皇十三年楊素所治徵言宮城之內本乏水源六年四月西城之陰土覺有潤以杖導之有泉隨涌出因名醴泉按醴泉爾雅曰甘露時降萬物以嘉謂之醴泉甘露雨也而漢魏郡國與唐離宮皆謂水從地出其味若醴誤矣

廣川書跋

九成宮醴泉銘祕書省檢校侍中鉅鹿郡公魏徵撰兼太子率更令歐陽詢書九成宮乃隋之仁壽宮也魏爲此銘亦欲太宗以隋爲戒可以見魏之志也唐人云書貴瘦硬方通神瘦近清寒清寒則氣易弱

硬則堅苦堅苦則勢易危深山道人積精鍊神滓穢
日去清虛日來雖頗清羸而冲和內融所以能肌膚
若冰雪綽約若處子歐陽所以可貴也 虞集

唐丹州刺史張崇碑

貞觀八年正書無書撰人姓名

右唐丹州刺史碑首尾已殘缺其可見者云公諱崇
字平高按新唐書劉裴傳後載起義功臣事迹有張
平高云綏州人從唐公平京城累授左領軍將軍蕭
國公貞觀初爲丹州刺史坐事以右光祿大夫還第
卒今以碑考之其事皆同惟傳以字爲名耳 金石錄
唐逸吳裴高士碑 貞觀八年正書無書撰人姓名

唐無量壽佛大像碑

貞觀十年正書無書撰人姓名

唐昭陵刻石文

貞觀十年太宗御製歐陽詢八分書

右唐昭陵刻石文太宗爲文德皇后立歐陽詢書其
文載太宗實錄今石刻已磨滅故世頗罕傳其畧可
見者有云無金玉之寶玩用之物木馬寓人有形而
已欲使盜賊息心存亡無異又云俯視漢家諸陵猶
如蟻垤皆被穿窬今營此陵制度卑狹用功省少望
與天地相昇永無後患其言非不丁寧切至也然竟
不免溫韜之禍太宗英武聰明過人甚遠而如此眷
眷不忘何哉以此知死生之際能超然無累者賢哲

之所難也又云國家府藏皆在目前與在陵內何異其詞尤陋得無為後世達士所笑乎金石錄

唐昭陵六馬贊

歐陽詢八分書殷仲容書降將名氏

右唐昭陵六馬贊初太宗以文德皇后之葬自為文刻石于昭陵又琢石象平生征伐所乘六馬為贊刻之皆歐陽詢八分書世或以為殷仲容書非是至諸降將名氏乃仲容書耳今附于卷末云金石錄

唐宕渠令孟畧碑

正書無書撰人姓名

唐益州長史裴鏡民碑

貞觀十一年李伯藥撰殷令名正書

右唐裴鏡民碑殷令名書令名與其子仲容皆以能

書擅名一時而令名遺迹存者惟此碑耳筆法精妙不減歐虞惜不多見金石錄

唐右僕射溫彥博碑

貞觀十一年岑文本撰歐陽詢

右唐溫彥博碑歐陽公集古錄跋顏勤禮碑後云按唐書溫大雅字彥弘弟彥博字大臨弟大有字彥將兄弟義當一體而名大者字彥名彥者字大不應如此蓋唐世諸賢名字可疑者多封德彝云名倫房玄齡云名喬高士廉云名檢顏師古云名籀而皆以字行倫喬檢籀在唐無所諱不知何避而行字余按顏之推家訓云古者名終則諱之字乃可以為孫氏江

南至今不諱字也河北士人全不辨之名亦呼爲字
字固爲字尚書王元景兄弟皆號名人其父名雲字
羅漢一皆諱之其餘不足怪也又顏師古匡謬正俗
載或問人有稱字而不稱名何也師古攷諸典故以
稱名爲是蓋當時風俗相尚如此初無義理也然師
古旣立論以稱名爲是而乃以字行殆不可曉也已

金石錄

唐贈高頰禮部尚書詔

貞觀十一年正書無姓名

右唐贈高頰詔書貞觀十一年改葬有詔贈禮部尚
書其事當載于史而隋書頰列傳唐書帝紀太宗實

錄皆不載

金石錄

唐太宗登逍遙樓詩

貞觀十二年長孫無忌揚師道
行書

唐姜寶誼碑

貞觀十二年正書無撰人姓名

唐砥柱銘

貞觀十二年

唐砥柱銘貞觀十二年特進魏徵撰祕書正字薛純
書其字因山鑿鑿就其窪平隨多少置字故不成行
序宛轉索於嶺嵌間以摹故難得世知貴之唐刻石
之文此其最大者也筆力有餘點畫不失尚多隸體
氣象奇偉猶有古人體法其後柳公權書刻招提今
已譌缺不可讀惟純所書在濁河間得完蓋摹擊之

工不至故耳

廣川書跋

唐龍門令皇甫忠碑 貞觀十四年

右皇甫忠碑著作佐郎李儼撰忠為秦州龍門令歲滿縣民前左勳衛裴公隱等一千三百人申省請留八座報云公等請來遲晚縣令今已替訖好人堪用縣國共須豈一縣士庶獨懷恫惜所請不允忠以唐太宗時為令當時臺省文字如此可愛秦州者義寧元年以河中之汾陰龍門置治汾陰武德二年從治龍門太宗十七年州廢今碑後列縣人姓名有錄事鄉長鄉老里正縣博士助教佐史等今之縣吏惟錄

事里正其名在爾

集古錄

唐令狐文軌像銘

貞觀十四年薛純正書

唐河間元王碑

貞觀十四年岑文本撰丁立政正書

右唐河間元王孝恭碑按新唐書孝恭自宗政卿歷涼州都督晉州刺史貞觀初為禮部尚書以卒今以碑考之自宗正遷禮部尚書坐事免尋復舊任俄授梁州都督改晉州刺史與司空無忌等同時冊拜觀州刺史世世承襲復授光祿大夫禮部尚書蓋孝恭凡三為尚書一免官一拜世襲刺史本傳皆不載而以梁州為涼者亦誤也又唐初功臣皆云圖形凌烟

閣而作碑乃作戟武閣戟武之名不見于他書惟當時石刻數數有之豈凌烟先名戟武而後改之邪金石錄

唐弘濟寺碑

貞觀十四年李伯藥撰正書無姓名

右唐弘濟寺碑在今汾州據唐會要此碑李伯藥撰按太宗初即位下詔於建義以來交兵之處為義士凶徒隕身戎陣者各建寺刹分命儒巨為銘凡七碑余所得者汜水等慈呂州普濟幽州昭仁與此碑凡四而虞世南褚遂良所撰今皆亡矣金石錄

唐李先生碑

貞觀十五年田世榮造劉君諤正書

唐岑文本三龕記

貞觀十五年

右三龕記唐兼中書侍郎岑文本撰起居郎褚遂良書字畫尤奇偉在河南龍門山山夾伊水東西可愛俗謂其東曰香山其西曰龍門龍門山壁間鑿石為佛像大小數百多後魏及唐時所造惟此三龕像最大乃魏王泰為長孫皇后造也錄集古

唐獨孤使君碑

貞觀十五年正書無書撰人姓名

右唐獨孤使君碑云君諱某字延壽而其名殘缺不可辨延壽施子也隋書外戚傳云施二子延福延壽元和姓纂亦云施生延壽皆不著其名又姓纂云延

壽封新蔡公而碑云封新蔡縣開國男亦當以碑為

正錄金石

唐孟法師碑貞觀十六年岑又本撰褚遂良正書

右孟法師碑唐岑文本撰褚遂良書法師名靜素江

夏安陸人也少而好道誓志不嫁隋文帝居之京師

至德宮至唐太宗十二年卒年九十七錄集古

唐段志玄碑貞觀十六年正書無書撰人姓名

右唐段志玄碑以唐史考之多不合碑云公諱集字

志玄而其名已殘缺然史初不載其名也碑云鄉平

人而史云臨淄人碑云謚忠壯而史云謚忠肅舊史

亦作忠壯與碑合又碑云圖形戡武閣河間元王碑

亦同錄金石

唐魏鄭公碑貞觀十七年太宗御製并行書

唐樂鄉縣令長孫迥墓誌貞觀十七年正書無書撰人姓名

唐神劔碑貞觀十七年正書無書撰人姓名

唐瑤臺寺碑貞觀十八年許敬宗撰諸葛思禎正書

唐贈百千詔貞觀十九年薛純陁八分書

唐帝京篇貞觀十九年太宗御製褚遂良行書

唐秦州都督姜確碑貞觀十九年于志寧撰僧智辨

唐晉祠銘貞觀二十年太宗御製并行書

右唐晉祠銘太宗撰并書晉祠者唐叔虞祠也高祖初起兵禱于叔虞祠貞觀二十年太宗為立碑焉金石

唐殷元嗣墓誌

貞觀二十一年正書無書撰人姓名

唐相州刺史侯莫陳肅碑

貞觀二十一年正書無書撰人姓名

右唐侯莫陳肅碑肅隋桂州總管頴之子也元和姓纂所載侯莫陳氏云其先後魏別部居庫斛真水周書云代武川人世為梁帥隨魏南遷為侯莫陳氏余嘗得頴及頴之孫涉墓誌皆云本劉姓系出漢楚元王交頴墓誌則以為父崇後周時賜姓涉墓誌則以

為崇王父豐後魏時賜姓二說已自不同而肅碑乃云漢中山靖王勝之後勝曾孫邵謀誅王莽不密避難於代因左言而命氏改姓侯莫陳焉自古史傳所載容有異同今頴肅涉三世歲月相接而碑誌所書自相乖戾如此皆莫知其孰是豈其姓氏本出夷虜而唐初以族望相高故妄言出于名胄乎金石錄

唐孔穎達碑

貞觀二十二年

志寧撰正書無書人姓名

右唐孔穎達碑子志寧撰世傳虞永興書據碑云穎達卒於貞觀二十一年時世南之亡久矣然驗其法蓋當時善書者規摹世南而為者也金石錄

右孔穎達碑于志寧撰其文磨滅然尚可讀今以其
可見者質於唐書列傳傳所闕者不載穎達卒時年
壽其與魏鄭公奉敕共修隋書亦不著又其字不同
傳云字仲達碑云字冲遠碑字多殘缺惟其名字特
完可以正傳之謬不疑以冲遠為仲達以此知文字
轉易失其真者何可勝數幸而因余集錄所得以正
其訛舛者亦不為少也乃知余家所藏非徒玩好而
已其益豈不博哉錄集古
跋孔穎達碑後
孔祭酒碑世傳虞永興書非也冲遠之沒迺後伯施

十年豈非當時學永興法者邪然筆勢道媚亦自可
珍東觀餘論

唐長廣長公主墓誌

貞觀二十二年正書無撰書人姓名

唐張慧湛墓誌銘

貞觀二十三年

右陳張慧湛墓誌銘不著書撰人名氏陳隋之間字
書極於精妙而文章類壞鄙俚豈時俗弊薄士遺其
本而逐其末乎予家集錄所見頗多自開皇仁壽而
後至唐高宗已前碑碣所刻徃徃不減歐虞而多不
著名氏如鉗爾君清德頌或有名而其人不顯如丁
道護之類不可勝數也慧湛陳人至唐太宗時始改

葬爾其銘刻字畫適勁有法玩之忘勸惜其不知為

何人書也錄集古

唐晉州刺史裴府君碑貞觀二十三年上官儀撰正君姓名殘缺

唐溫泉銘貞觀中太宗御製并行書

唐文皇屏風帖

文皇嘗作真草書古帝王龜鑑語為二屏風示羣臣

今所存者草書耳輕俊流便宛然有右軍永興風度

惜天骨小乏文法猶滯後有祝寬夫姜夔王允初跋

亦佳姜遂題字荒愴不知體大可笑也王世貞

唐立隋工部尚書段文振碑貞觀中潘徽撰歐陽詢入分書

唐太府卿李襲譽墓誌貞觀二十三年正書無書撰人姓名

右唐李襲譽墓誌唐史列傳載襲譽官闕甚畧據墓

誌云武德初拜太僕卿出為潞州總管尋徵拜太府

卿而傳言高祖定長安授太府少卿者蓋傳誤傳言

襲譽坐私憾杖殺番禾丞劉武嘗廢為民流泉州卒

而墓誌不載疑諱之也錄金石

唐立後周太宗伯唐瑾碑貞觀中于志寧撰歐陽詢正書

右周唐瑾碑以後周書及北史列傳校之首尾皆抵

牴不合傳云字附麟而碑云字子王傳云始仕為尚

書員外郎而碑云釋褐員外散騎侍郎傳云初封始

臧縣子而碑云永昌子傳云為吏部尚書以父憂去職尋起令視事而碑云為周太祖記室其年丁武公憂起復太子舍人傳云為驃騎大將軍開府儀同三司進爵臨淄伯轉吏部尚書于謹伐江陵以為元帥府長史而據碑為吏部尚書皆在為驃騎開府及元師唐長史已前又其改封臨淄伯蓋為龍驤將軍時而其為開府乃進爵為公傳云六官建授禮部中大夫而碑云授宗伯傳云出為祭州刺史歷柘州破州轉荊州總管府長史入為吏部中大夫歷御正納言中大夫久之除司中大夫兼內史卒于位而碑云光

為柘州刺史乃遷蔡州授司宗御正納言又轉荊州總管尋遷小宗伯乃薨其遷拜次第不固如此傳云瑾嘗為戶部尚書硤州刺史吏部中大夫今據碑皆未嘗拜而柘州碑作柘碑云瑾嘗為黃門侍郎又為散騎常侍尋領大著作修國史及起居法又為侍郎傳皆不載其卒也傳云贈小宗伯而碑云贈華州刺史傳云謚曰方而碑云謚曰懿于志寧撰貞觀中其孫皎所立後周書北史告唐初修距瑾之卒歲月未遠而顛倒錯繆如此然其官爵名字子孫不應有誤皆當以碑為據也

錄金石

唐歐陽詢帖

余求前人論書必先擇筆韋昶善書而妙於筆故子敬稱爲奇絕蓋筋骨肉理皆筆所寄率更於筆特未嘗撰而者得佳趣則所寄者心爾論者謂飛帛冠絕有龍虬戰鬪之象雲霧輕飄之勢真行出於大令森森焉若武庫矛戟至使智永奪氣焉然飛帛篆書世不復傳今觀真行章草知無勅敵也虞伯施謂詢不擇紙筆皆得如意宜遂良不能及云廣川書跋

右率更臨帖吾家率更蘭臺世有清德其筆法精妙迺其餘事豈止士人模楷雖海外夷狄皆知爲貴而後裔所宜勉旃庶幾不殞其美也

此碑歐陽信本晚年所書筆畫險勁若鑄鐵所成者反覆視之定爲初刻本然而信本雖極力追倣右軍而其規矩媚趣或得於大令爲多學大令者羊舍人薄給事爲最優自後解有聞者唯法極師暉睨而從之至信本起殆與之抗衡而無愧者也其有名之跡入宣和內府者凡十四紙惜皆不存而金石畧所載二十三種亦惟邕禪師塔銘昭陵六馬贊皇甫氏碑醴泉銘盛行耳類皆翻勒之多無以見孤峯崛起義獻末復留意李北海正此所謂學義獻者也舊嘗

獲見周侍御家侍御既坐貶竄竊意必歸天上不知復流落人間今得披玩累日抑何幸哉殷貞周彛可得而此卷不可得博雅君子尚思謹祕而傳焉宋鑿唐宰相房玄齡碑貞觀二十三年撰人姓名殘缺褚右唐房玄齡碑文字摩滅斷續不可考究惟其名字僅存其後題修國史河南公而名姓殘缺者褚遂良也按舊唐史云玄齡名喬字玄齡而新史乃云名玄齡字喬今碑所書與新史合惟宰相世系表又云玄齡字喬松者不知何所據也錄金石唐褚河南書年次不一以玄齡碑是其所書故附于後

褚河南書本學逸少而能自成家法然疏瘦勁鍊又似西漢往往不減銅籀等書故非後世所及皆逸少所受書法有謂多骨微肉者筋書多肉微骨者墨猪多力豐筋者聖無筋無力者病河南宣所謂瘦硬通神者邪

褚河南於書蓋天然處勝故於學雖雜而本體不失初學晉右軍既又學虞伯施後於史陵得用筆意迺曰此法更不可教人是其妙處也羿之立教必志於穀至於巧之所及當自其心得非可法度準繩授也學至於此當自知之廣川書跋

唐褚書千文

褚遂良書見於石刻者世亦甚鮮况其真跡乎今觀所書千文柔勁險媚真如鐵綫縈結而成或者評為柳誠懸所臨褚書似則似矣其入神處恐非誠懸所至也

唐太宗哀冊文

天台詹君國器嗜古如嗜利近於汴梁市中賸得褚登善所撰唐太宗哀冊文一卷舊嘗藏相臺岳珂倦翁家後有北燕喬貴成所題定為唐人書詹君既自識其左復請濂一言之濂聞唐故事哀冊國之大典

也非職載筆至司鈞衡者不敢為之登善自貞觀二十二年九月己亥為中書令二十三年三月丁卯太宗不豫四月己亥幸翠微宮五月己巳崩于含風殿庚午奉大行御馬還京師當是時登善東政中書縉熙帝載者已九月哀冊必屬之蓋無疑也此卷當為命藁之第二故於二十三年下闕歲次己酉五月甲辰八字嗣皇帝下不書治字家傳縉雲下無高祖配天一人有慶八字遡悲風於長下闕銜字然特其闕文耳徵之大詔令羅圖琬琰集文粹文苑諸書其改又各有同異殆不能悉數也濂竊按正史雜史咸謂

太宗以八月庚寅日葬與大詔令等書並同庚寅則八月之十八也今獨云庚子則是月之二十八日不知何以有一旬之差將史誤邪或藁本之筆訛也嗣皇帝之名不書懼僭也其理固當太宗之崩既書二十六日已巳矣年月甲子初何足隱諱而懸空之邪尤有不可得而曉者相去七百餘載其事不可臆度未可以遽言也若論字畫當爲登善所書登善初師虞世南晚入右軍之室故唐之能正書者僅二十八人而登善居三四之間此卷溫潤似虞其結體則多法右軍世之人徒見登善所書或與薛稷類者遂疑

之殊不知先哲有兼人之才而其作字初不拘一體張顛善草書至其小楷極端謹有法傳其學者惟顏真卿得之爾觀登善者宜以是求之簞成雖號能鑿古其言似不足徵也國器尚永寶之翰林學士金華宋濂題

唐薛稷書

貞觀永徽之間
此據集古錄云

薛稷書刻石者余家集錄頗多與墨蹟互有不同唐世顏柳諸家刻石者字體時時不類謂由模刻人有工拙昨日見楊褒家所藏薛稷書君謨以爲不顏信矣凡世人於事不可一槩有知而好者有好而不知

者有不好而不知者有不好而能知者褒于書畫好而不知者也畫之為物尤難識其精粗真偽非一言可達得者各以其意披圖所賞未必是東筆之意也昔梅聖俞作詩獨以吾為知音吾亦自謂峯世之人知梅詩者莫吾若也吾嘗問渠最得意處渠誦數句皆非吾賞者以此知披圖所賞未必得東筆之人本意也

錄集古

書貴得法然以點畫論法者皆蔽於書者也求法者嘗在體用備處一法不亡濃纖健快各當其意然使結字不失疏密合度薛稷於書得歐虞褚陸遺墨至

備故於法可據然其師承血脉則於褚為近至於用筆纖瘦結字疏通又自別為一家劉景升書家祖師鍾繇胡昭皆受其學然昭肥繇瘦各得其一體云

廣川

跋書唐益州學館廟堂記

永徽元年撰人姓名殘缺顏有意正書

高朕之名於義不安頗疑有意得於古碑之訛缺爾

存之以俟博學者此記顏有意書

錄集古

右唐益州學館廟堂記成都縣令顏有意書撰人題法曹陳王文學太子詹事待詔弘文館陵州長史而姓名殘缺不可辨集古錄直以為有意撰非也碑陰

在當時官寮姓名後人題云此記賀遂亮撰未知果
是否記文敘述前世遺跡考究同異文詞古雅甚可
喜也金石錄

唐學館廟堂記碑陰

唐光祿大夫巨盧寬碑

永徽元年李義甫撰正書無姓名

唐瘦陶縣令李明府清德頌

永徽元年正書無書撰姓名

唐閬喜縣令江彥碑

永徽二年正書無書撰人姓名

唐宜州別駕楊旻墓誌

永徽二年正書無書人姓名

唐鄧意碑

永徽三年正書無書撰人姓名

唐房仁裕母李夫人碑

永徽三年八分書無書撰人姓名

唐光化縣主墓誌

永徽三年正書無書撰人姓名

唐三藏聖教序

永徽四年太宗撰褚遂良正書又王行滿正書又僧懷仁集逸少正書

題集逸少書聖教序後

書苑云唐文皇製聖教序時都城諸釋諉弘福寺懷
仁集右軍行書勒石累年方就逸少真蹟咸萃其中
今觀碑中字與右軍遺帖所有者纖微克肖書苑之
說信然然近世翰林侍書輩多學此碑學弗能至了
無高韻因自目其書為院體由唐吳通微昆弟已有
斯目故今士大夫玩此者絕少然學弗至者自俗耳
碑中字未嘗俗也非深於書者不足以語此政和四

年四月二十四日黃某長齋又書

東觀
餘論

集右軍書聖教序心經余前後閱數十本獨此舊榻本不失筆意最佳耳此序爲唐文皇記爲高宗作今以冠藏經蓋敘記僧玄奘求法事也始奘於武德末乞往西佛地取經不許乃私從一賈胡闌出邊亡何胡棄之去幾死獨身越五峰謁高昌王傳致西突厥可汗歷十餘國而抵鳩摩從胡僧戒賢習大乘論譯經語又之中天天竺戒日王所說法積十八年而以二象馱夾經像還至涼州上聞手詔飛騎迎之令安夏阿蘭若譯經行世而父子相率爲序記侈大之噫

彼高宗者固耳豈文皇之雄畧豪氣而遂衰沮不振至此耶彼其志得而無所事事意倦而感慨係之不之於長生則之於因果無足怪也奘旣託之文皇懷仁又託之右軍以不朽其業卽令達磨師見之不滿一笑耳右軍真蹟固多第自禊帖外不應行法大小勻整乃爾且梵字多所不備其小小展縮偏傍轉合所不免也

王世貞

聖教序書法爲百代楷模病之者第謂其結體無別構偏傍多假借蓋集書不得不爾仲蔚謂出文皇手又經于志寧等潤色不無失真是不知咸亨中沙門

懷仁摸集勒石而心經末有志寧等潤色題字蓋玄
奘方於洛中總譯西域所齎經藏以志寧等領其事
故云爾唐世宰相有兼譯經潤文使者卽其職也凡
唐藏經卷尾皆有諸公名姓此何與于書而仲蔚乃
以是病之陋一至此乎展冊爲之失笑貞王世

又
聖教序雖沙門懷仁所集書然從高宗內府借右軍
行筆摹出備極八法之妙真墨池之龍象蘭亭之羽
翼也余平生所見凡數十百本無踰於此者其波拂
鉤磔妙處與真蹟無兩當是唐時搨本耳去歲嘉平

臘得此本今年伏中復得定武蘭亭爲自快自賞者
久之窮措大餘生一何多幸耶貞王世

又
聖教序未裂本余性往得之多爲人乞去而留其頗
佳者此亦其一也懷仁旣善書又從文皇借得真蹟
摹出以故雖不無偏旁輳合而不失意他集右軍書
者未盡爾也貞王世

唐述三藏聖教序記永徽四年高宗撰褚遂良正書
又王行滿正書
余舊藏褚登善聖教序記婉媚迢逸波拂處虬建如
鐵線蓋善本也後陝省致一紙輕弱不足言或以爲

翻刻或以為有二本第俱有可疑者舊藏本稱龍朔三年建按遂良以永徽六年貶漢州永慶二年徙桂州未幾貶愛州歲餘卒蓋未嘗生及龍朔也豈遂良嘗書之至是始摹榻上石耶陝省本則云永徽四年中書令臣褚遂良書攷之本傳宰相表遂良貞觀末為中書令後罷永徽三年以吏部尚書同中書門下三品四年進尚書左僕射疑皆後人附益之耳王世貞唐定州刺史張萬福墓誌永徽五年正書無書撰人姓名唐張令陽浮圖銘永徽五年張士貴撰正書無書撰人姓名唐穀州刺史裴君清德頌永徽五年正書無書撰人姓名

唐萬年宮碑陰題名

右唐萬年宮碑陰者高宗自為萬年宮碑詔宰相而下皆題名于其陰余每覽此碑見長孫無忌褚遂良許敬宗李義甫同時列名未嘗不掩卷太息焉金石錄唐右衛將軍豆盧承基墓誌永徽六年正書無書撰人姓名唐薛收碑永徽六年于志寧撰正書無姓名

右唐薛收碑文字殘缺其可讀處以唐史校之無甚異同惟收之卒謚曰懿而史不書爾又收之子元超據唐史及此碑皆云名元超而楊炯盈川集戴炯所為元超行狀乃云名振字元超蓋唐初人多以字為

名耳錄金石

唐潤州刺史竇志寂墓誌顯慶元年八分書無書撰人姓名

唐中書令崔敦禮碑顯慶元年于志寧撰正書無姓名

右唐崔敦禮碑按新唐史列傳云敦禮字安上而宰相世系表則云名安上字敦禮今此碑所書與表合

然舊史及碑皆言敦禮本名元禮高祖為改名焉其

孫疏墓誌亦云名敦禮蓋疑其以字行爾又世系表

其末載崔氏為宰相者二十餘人不獨不著敦禮乃

其闕漏也錄金石

唐贈左僕射楊達碑顯慶元年正書無書撰人姓名

唐贈左僕射楊達碑達觀德王雄弟也煬帝時官至

納言卒贈吏部尚書唐顯慶中以武后外祖父加贈

左僕射官為之立碑以隋書列傳考之時有異同傳

云字士達而碑云字叔莊傳云年六十二而碑云年

六十五皆當以碑為正又傳云謚恭而碑云謚懿余

集錄有李嶠所撰武后母墓碑亦云謚為恭與傳合

未知孰是也錄金石

唐散騎常侍張後胤碑顯慶三年正書無書撰人姓名

唐乞伏士幹墓誌顯慶三年正書無書撰人姓名

唐立階辛彖墓誌顯慶三年正書無書撰人姓名

唐衛國公李靖碑顯慶三年許敬宗撰王知敬正書

右李靖碑許敬宗撰唐初文章務浮巧故多失事實不若史傳爲詳惟其官封頗備史云爲撫慰使而碑云安撫使其義無異而靖時未嘗有撫慰使也又靖爲刑部尚書以本官行太子左衛率其封衛國公也授濮州刺史蓋太宗以功臣爲世襲刺史後雖不行皆史所宜書錄集古

右唐李靖碑集古錄云靖之封衛國公也授濮州刺史蓋太宗以功臣爲世襲刺史後雖不行史宜書而不書者闕也余按新史長孫無忌傳載無忌以下授

世襲刺史者凡十四人姓名具存蓋其事已見于他傳則于本傳似不必重載也錄金正

唐辨法師碑顯慶三年李儼撰薛純陀正書

右辨法師碑李儼撰薛純陀書純陀唐太宗時人其書有筆法其遒勁精悍不減吾家蘭臺意在當時必爲知名士而今世人無知者然其所書亦不傳于後世余家集錄可謂博矣所得純陀書祇此蓋其不幸湮沈泯滅非余錄得之則遂不見于世矣乃知士有負絕學高世之名而不幸不傳于後者可勝數哉可

勝歎哉

錄集古

辯法師碑薛純陀書歐陽公嘗評其不減率更然所
書不傳永叔所得唯此純陀貞觀十二年奉敕書銘
砥柱其字磊落如山石自開隱鱗而出可以見方丈
之勢固無牽強以成當時如虞伯施褚登善號能書
者皆避而讓之其後柳誠懸愛其書恐失其次第則
又別書於石後世得純陀所書砥柱銘者皆碎雜叢
疊必按此序之砥柱銘為薛純而此碑為薛純陀嘗
為祕書正字本名純陀後以純自列於時余於類書
見之廣川書跋
右唐辯法師碑薛純陀書歐陽公集古錄云純陀太

宗時人其書有筆法意其當時必為知名士而今世
人罕知者集古所得純陀書祇此而已余按法書要
錄云薛純陀學歐草微傷肥鈍亦通之亞也然則純
陀當時真知名矣余又得純陀八分書比于碑歐陽
公所未見也與純陀同時有薛純唐太宗命書砥柱
銘者其筆法與純陀絕相類疑卽一人蓋唐初時人
名姓多如此爾金石錄

唐尉遲敬德碑

顯慶四年許敬宗撰正書無姓名

唐紀公碑

顯慶四年正書無書撰人姓名

唐紀功碑

顯慶四年高宗撰并行書飛白題額

唐涼國太夫人郁久閼氏碑顯慶四年許敬宗撰

唐蘭陵長公主碑顯慶四年李義府撰正書無姓名

右唐蘭陵長公主碑李義甫撰唐書列傳公主太宗第十二女而碑云第十九女蓋傳誤也錄石

唐李汪墓誌龍州元年正書無書撰人姓名

唐修正寺舍利塔碑龍朔二年楊武英撰張延壽正書

唐齊興寺碑龍朔二年正書無書撰人姓名

唐改造彌勒閣碑龍朔三年行書無書撰人姓名

唐岐州法門寺舍利塔銘龍朔三年賀蘭敏之撰并

唐道因法師碑龍朔三年李儼撰歐陽通正書

唐雲麾將軍燕巒碑麟德元年正書無書撰人姓名

唐乙速孤晟碑麟德元年正書無書撰人姓名

唐孫仁師百濟班師碑麟德元年馬大斌撰正書無姓名

唐清河公主碑麟德元年李儼撰暢整正書

右唐清河公主碑公主太宗女也碑云下嫁程知節

之子處亮知節碑及唐史知節列傳元和姓纂所載

皆同惟公主列傳作懷亮非是唐史一書首尾自相

乖戾者甚眾非特此也錄金石

唐立後魏郢州刺史劉賓碑麟德二年人分書無書撰人姓名

唐益州都督程知節碑麟德二年許敬宗撰暢整正書

唐蘭長史碑 麟德二年正書無書撰人姓名

唐趙弘智碑 麟德二年干志寧撰殷仲容正書

右唐趙弘智碑云弘智字處仁而史不載又云自大子舍人為吏部員外郎遷國子博士檢校吏部郎中尋為越王府長史兼檢校吏部侍郎遂轉黃門侍郎舊史亦云累遷而新史直云繇太子舍人拜黃門侍郎爾又弘智為國子祭酒嘗領東宮賓客而新舊史亦皆不載 錄金石

唐登封紀號文 乾封元年高宗撰并行書飛白書額碑側正書又小字書

右唐登封紀號文凡兩碑皆高宗自撰并書其一大

字磨崖刻于山頂其一字差小立于山下然世頗罕傳政和初余親至泰山得此二碑入錄焉 錄金石

唐司元太常伯竇德玄碑 乾封元年李儼撰姪節正書

右唐竇德玄碑以唐史本傳考之其事多合惟德玄為御史大夫攝吏部禮部度支三尚書遂遷大司憲史皆不載又其弟德遠史云封樂安男而碑作樂平皆當以碑為正 錄金石

唐老子冊文 乾封元年行書無姓名

唐舒州刺史楊承仙碑 乾封元年張昌齡撰姓名

唐蒲州刺史李公德政碑 乾封元年正書無書撰人姓名

唐紀國先妃陸氏碑乾封元年正書無書撰人姓名

唐孔宣尼碑乾封元年崔行功撰孫希範八分書

唐宰相于志寧碑乾封元年令狐德棻撰于立政正書

右唐于志寧碑以考唐史列傳其微時所歷官史多不書今亦不復錄錄其尤著者碑云大業十年為清河縣長而傳云為冠氏長碑云自中書侍郎遷兵部授蒲州刺史不赴後為衛尉卿判太常卿事以本官兼雍州別駕遷禮部尚書而史皆不載史云自侍中拜尚書左僕射同中書門下三品頃之兼太子少師遷太傅顯慶四年以老乞骸骨詔解僕射更拜太子

太師仍同三品今以碑考之其初拜僕射也未嘗領中書門下三品至罷僕射乃為同中書門下叅謀朝政皆史家之誤又按百官志唐初宰相有叅議朝政叅預朝政叅知政事其後有同中書門下三品同平章事永淳中遂以平章事入銜而獨無叅謀朝政之名蓋惟見于此爾金石錄

唐弘文館學士顧君墓誌乾封二年正書無書撰人姓名

右唐顧君墓誌已殘缺亡其前一段以事考之蓋顧胤也胤高宗朝為弘文館學士司文郎中卒姓名附見唐書令狐德棻傳其子琮仕武后為宰相今此誌

但云第六子琬等而無琮豈當時官未顯故不載歟

金石錄

唐鄭國夫人武氏碑乾封二年李安期撰殷仲容八分書

唐滁州刺史劉君碑乾封二年李儼撰顏有意正書

唐法師王先生碑乾封二年于敬之撰王玄宗書

唐相州刺史許圜師德政碑乾封二年正書無書撰姓名

唐寶義寺碑乾封三年正書書撰人姓名殘缺

唐杜延基造心經總章元年蘇休奕正書

唐曹王府典軍劉公碑總章二年趙務玄撰正書無姓名

唐齊州刺史薛寶積清德頌總章二年正書無書撰人姓名

唐大興善寺舍利塔銘總章二年李儼撰殷仲容八分書

唐歷城令劉文恪清德頌總章二年正書無書撰人姓名

唐洪州都督吳廣碑總章二年

右吳廣碑不著書撰人名氏而字畫精勁可喜廣字黑闥唐初與程知節秦叔寶等俱從太宗征伐後與殺建成有功至高宗時為洪州都督以卒然唐書不見其名氏惟會要列陪葬昭陵人有洪州刺史吳黑闥亦不知其名廣也其名字事蹟幸見于後世者以有斯碑也碑字稍磨滅世亦罕見獨余集錄得之遂以傳者以其筆畫之工也故余嘗為蔡君謨言書雖

學者之餘事而有助於金石之傳者以此也

唐武師模碑

總章三年崔松客撰正書姓名殘缺

唐尉遲寶琳碑

咸亨元年許敬宗撰王知敬正書

唐淄川公李同碑

咸亨元年撰人姓名殘缺諸葛思禎正書

唐龍興宮碧落碑

咸亨元年篆書無書撰人姓名

右碧落碑在絳州龍興宮有碧落尊像篆文刻其背故世傳為碧落碑據李璿之以為陳惟玉書李漢以為黃公譔書莫知孰是洛中紀異云碑文成而未刻有二道士請刻之閉戶三日不聞人聲人怪而破戶有二白鴿飛去而篆刻宛然此說尤怪世多不信也

碑文言有唐五十三祀龍集敦牂乃高宗總章三年

歲在庚午也又云哀子李訓誼譔為妣妃造石像

按唐書韓王元嘉有子訓誼譔而無譔又有幼子訥

元嘉以則天垂拱四年見殺在總章三年後十八年

有子訥不足怪而不應無譔蓋史官之闕也

集古錄

碧落篆李肇得觀中石記為陳唯玉書字奇古行筆

精絕不類世篆學而唯玉於唐無書名於世不應一

碑便能到古人絕處李陽冰於書未嘗許人至愛其

書寢臥于下數日不能去段成式謂碑有碧落字故

以名之李肇謂碑在碧落觀故名李漢謂終於碧落

字而得名余至絳州龍興宮考其記知舊爲碧落觀
又篆文若未畢者終非碧落字則肇說是也其云有
唐五十三禩龍集敦牂永叔謂高宗總章三歲以唐
曆考之實咸亨元年總章者誤也

絳州碧落篆刻天尊背州將不欲以槌擊石像廼摹
別石因封其舊石像今世所得皆摹本也雖橫直圓
方典刑有稽然遁其神者衆矣段成式言樊宗師作
誌令陳惟玉立太行山上此言險怪難知豈嘗求得
其當而妄爲戲哉世言字不考古甚則以品爲鄰今
於古文數字正如此便知後世不識古字而妄議者

可以歎也

廣川
書跋

右唐碧落碑大篆書其詞則唐宗室黃公譔所述或
云陳惟玉書或云譔自書皆莫可知李肇及李漢並
言李陽冰見此碑裴徊數日不去又言陽冰自恨其
不如以槌擊之今缺處是也此說恐不然陽冰嘗自
述其書以謂斯翁之後直至小生於他人書蓋未嘗
有所推許唐人以大篆當時罕見故妄有稱說耳其
實筆法不及陽冰遠甚也

金石
錄

絳州碧落碑唐高宗咸亨元年庚午歲韓王元嘉之
子訓等爲其妣房氏造碧落天尊像於龍興宮而刻

其文於背故以名碑然不知何人書據李旋之玉京宮記以爲陳惟正李漢黃公記以爲李訓之弟譔始莫能定而翠岩龔聖予則又以爲宗室瓘豈或有所考耶吳叡張天雨讀□爲喧爲曜者非當以釋文鄰字爲是俞希盧辨叨作叩亦大家而釋文則又訛矣蓋此雜出於鐘鼎篆籀諸文其亦憂憂乎難知哉從水從人說文中音乃歷反溺則音奴弔反釋文今借休爲弱亦恐非本字之義而其他可疑者甚衆考禮之冗未暇及之姑識其後俟博雅君子正焉

唐徐元禮碑

咸亨三年

宋蓋坡

右徐元禮碑崔行功撰趙仙客書元禮唐高祖子也以碑考傳年壽官闕悉同而碑云使持節徐譙泗三州諸軍事徐州刺史又云贈太尉使持節大都督冀湘貝滄德魏博等八州諸軍事冀州刺史傳云爲徐州都督又云贈冀州大都督傳旣簡畧又都無法而碑之所書亦失也蓋刺史非兼州之官都督非一州之號碑云持節徐譙泗三州諸軍而傳獨爲徐一州刺史此其失也當如前史持節秦涼州諸軍事秦涼二州刺史乃爲得爾其書贈官則如碑之書是矣蓋爲一州刺史而兼督八州軍事爾都者有所兼

總之名也此特小故而余區區辨之者前史失之久矣又國朝自削方鎮之權而節度使都督無復兼州而舊名不除是節度都督自施于已此不可不正其失也

集古錄

古今法書苑卷之六十七

古今法書苑卷之六十八

吳郡王世貞元美甫編

雲間王乾昌伯元甫校

十三之石

十四

唐興昔亡單于阿史邲彌射碑

咸亨四年正書無書撰人姓名

右唐阿史邲彌射碑彌射本西突厥嘗歸朝後代龜

茲爲蘇海政所殺舊唐史紀彌射事甚詳多與碑合而新史所書甚略如高宗朝冊爲崑陵都護興昔亡單于皆不載碑云單于諱某字彌射而闕其名不書史但言名彌射豈作碑者爲緣飾之乎

唐張士相墓誌

咸亨四年正書無書人姓名

唐幽州都督盧承慶碑

咸亨四年八分書無書撰人姓名

唐金剛經

咸亨四年正書無姓名

唐太常卿裴君妻韋氏墓誌

咸亨四年正書無書撰人姓名

唐瑞氣觀天尊像碑

咸亨四年何彥先撰正書無

唐戎州刺史董寶亮碑

咸亨四年李儼撰張遂隆八分書

唐臨汾縣令干府君德政碑

咸亨四年謝祐撰柳洋正書

唐智乘寺禪院碑

咸亨四年阮立德撰李承福正書

右智乘寺禪院碑者唐鄭惠王所作也惠王名元懿高祖第十三子也有子十人列于碑後又第五子樂陵公闕其名按唐書宗室世系表樂陵公名球不知

一百一碑字何為獨闕也今唐書年表以嗣王敬為敬樂平

公珪為樂安公新平公璿為遂三者皆史家之失當

以碑為正世系譜牒歲久傳失尤難考正而碑碣皆

當時所刻理不得差故集古所錄於前人世次是正

頗多也 集古錄

長子縣智乘院碑唐鄭王文學阮立德撰李承福書

碑成於咸亨中則文帝時也考次鄭王元懿唐高祖

第十三子武德四年分國于滕出刺沅州貞觀七年

徙鄭十七年持潞州節改絳州一年再持節潞州復

持節絳州所至以治能稱善決大獄高宗褒以優詔

當其時鄭王名重於朝廷為宗室表顯慶元年持節
安沔隨郢安州刺史此其所歷也唐書惟叙鄭潞絳
三州不言再持潞絳第其為安州刺史亦不著也子
敬嗣國新舊書皆作敬蓋因其弟琳頭名疑皆從王
也唐在中世宗子皆以材任職而敬之三世為夷簡
為宗閔琳之再世為勉皆位宰相其在當時至顯而
史所書若此可勝考邪然琛瑋琰璿璿珩碑皆不具
而別見于龕石此宜史官不能備錄也廣川書跋
唐阿史那忠碑咸亨四年正書無書撰人姓名
石唐阿史那忠碑唐書列傳云忠尚宗室女定襄縣

主始詔姓獨著史今此碑當時所立題云阿史那府
君之碑而元和姓纂亦云阿氏那氏開元中改為史
疑傳誤也金石錄

唐馬周碑上元元年殷仲容八分書許敬宗撰

唐越州長史李基碑上元二年張大素撰行書無姓

唐尹府君碑上元二年正書無書撰人姓名

唐李德攜造像碑上元二年正書無書撰人姓名

唐平原寺舍利塔銘上元三年撰人名使僧仁基正書

唐明徵君碑上元三年高宗撰高正臣行書王知敬篆

石唐明徵君碑徵君者梁明山賓也高宗朝其裔孫

崇儼以方伎進故立此碑舊唐史言高宗自製文而書之非也蓋高宗撰文高正臣書耳 金石錄

唐九門縣西浮圖碑 上元三年董行思撰傳德節書

右九門縣西浮圖碑唐應詔四科舉董行思文清河傳德節書題云九門縣合鄉城人等為國建浮圖之

碑浮圖在智矩寺中寺今亦廢碑上元三年建按唐

有兩上元此碑云歲在丙子乃高宗上元三年也肅

宗上元三年歲在壬寅爾 金石錄

唐任丘縣令王君碑 儀鳳元年崔融撰八分書無姓名

唐黎尊師碑 儀鳳元年盧照鄰撰王大義行書

右唐黎尊師碑題云盧子昇字照鄰撰按唐史盧照鄰字昇之與此碑不合蓋唐初人多以字為名爾至以子昇為昇之疑史之誤 金石錄

唐英國公李勣碑 儀鳳二年

右唐李勣碑按唐史太宗屬疾出勣為疊州都督高宗立召授檢校洛州刺史今以碑考之其除洛州乃在太宗朝高宗即位授開府儀同三司爾又新舊史皆云勣年八十六而碑云年七十六碑高宗自撰其所書官爵年壽皆可信不疑也 金石錄

唐觀音十大願品經 儀鳳三年正書無姓名

唐大興國寺舍利塔碑

儀鳳四年越王貞撰集正書

唐國子司業于立政碑

調露元年撰人姓名殘缺陳遺王八分書

唐葛仙公碑

調露二年梁陶弘景撰陳昇正書

唐恒寂嶺路銘

調露二年正書無書撰人姓名

唐任城令元明府清德頌

調露二年八分書無書撰人姓名

唐善化府折衝張君墓誌

永隆二年正書無書撰人姓名

唐開業寺李公碑

開耀二年李尚一撰蘇文舉正書

唐陽翟侯夫人陸氏墓誌

開耀二年周思茂撰正書無姓名

右唐陽翟侯夫人陸氏墓誌陽翟侯者褚遂賢也元

和姓纂及唐書宰相世系表載遂賢一子兼藝為永

州司功今此誌云二子兼善兼愛而無兼藝其兼善

兼愛二子姓纂唐史漏落容有之惟兼藝墓誌不書

者何也豈非唐表誤乎

金石錄

唐少姨廟碑

永淳元年楊炯撰沮渠智烈書

右唐少姨廟碑楊炯撰云少姨廟者則漢書地理誌

崇高少室之廟也其神為婦人像者則故老相傳云

啓母塗山氏之妹也余按淮南子云塗山氏化為石

而生啓其事不經固已難信今又以少姨為塗山氏

之妹廟而祀之其為淺陋尤甚蓋俚俗所立淫祀也

炯既載之干碑又遂以為漢書所謂少室之廟者何

其陋哉 金石錄

唐無量壽佛像碑 永淳元年張昌齡撰吳知禮八分書

唐劉黑仁等造徘徊碑 永淳二年行書無書撰人姓名

唐天后發願文 永淳二年王知敬正書

唐天后少林寺碑 永淳二年王知敬正書

唐司馬山彌勒后像碑 永淳二年篆書無書撰人姓名

唐夏啓母廟碑 永淳二年崔融撰沮渠智烈書

石唐啓母廟碑崔融撰梅淮南子云禹治鴻水通轅
轅山化為熊塗山氏見之慙而出至嵩高山下化為
石方生啓為曰歸我子石破北方而啓生其說可謂

恠矣然漢武帝幸緱氏至中岳見夏后啓母石列于
詔書則固已信之矣其後郭璞注山海經顏師古注
漢書皆具載其語而融又文其事于碑流俗安得不
惑乎 金石錄

唐相州刺史陶雲德政碑 永淳三年張義咸撰行書無姓名

右唐申州錄事張義咸撰雲字大舉河南伊闕人也

高宗時為相州刺史碑永淳三年立于為河北轉運
使至真定府見碑仆在府門外半埋地中命工掘出
立于廡下字為行書筆蹟迥麗而不著書者姓名惜

哉 集古錄

唐高士廉瑩北記許敬宗撰趙模正書

右唐高士廉瑩北記唐史及元和姓纂皆云士廉父名勵而北史作勸今此碑與北史合蓋唐史及姓纂轉寫誤爾許敬宗撰趙模書模字畫甚工蓋貞觀中太宗命臨蘭亭序者金石錄

唐褚亮碑八分書無書撰人姓名

右唐褚亮碑唐書云亮杭州錢塘人而碑云晉南遷家于丹陽按元和姓纂自有錢塘褚氏與亮族系不同唐史蓋失之金石錄

唐洛州刺史賈公清德頌正書無書撰人姓名

右唐洛州刺史賈公清德頌按唐史循吏傳賈敦頤敦實相繼為洛州刺史有惠愛郡人皆為刻石號棠棣碑今敦實之碑亡矣此碑載初除洛州制書其名乃敦頤也又武后實錄敦實傳中亦作敦頤以此知唐史傳寫之誤又按法書要錄此碑王知敬書以知敬所書他石刻較之字畫不類未知果知敬書否也

金石錄

唐道藏經序弘道元年高宗則天撰王懸河行書

唐追尊玄元皇帝詔弘道元年王懸河行書

唐述聖紀文明元年武后撰中宗正書

唐歐陽詢妻徐夫人墓誌文明元年鄧玄廷撰子通正書

右唐歐陽詢妻徐氏墓誌云徐姑以夫恩封渤海郡君尋加渤海郡夫人最後以子恩封渤海太縣君梅本朝之制婦人既封郡君或郡夫人再以子貴加恩則直封為郡太君郡太夫人不復為縣太君矣蓋一時之制如此又不曰縣太君而曰太縣君與今名號亦異也唐世婦人封邑次叙史家不載偶見于此志

函金石錄

唐歐陽通書按通所書碑帖無年次錄于其母墓誌後

書家擇筆如逢蒙承弓矢漢世郡貢免毫惟趙國為

右唐洛州刺史賈公清德頌按唐史循吏傳賈敦頤敦實相繼為洛州刺史有惠愛郡人皆為刻石號棠棣碑今敦實之碑亡矣此碑載初除洛州制書其名乃敦頤也又武后實錄敦實傳中亦作敦頤以此知唐史傳寫之誤又梅法書要錄此碑王知敬書以知敬所書他石刻較之字畫不類未知果知敬書否也

金石錄

唐道藏經序弘道元年高宗則天撰王懸河行書

唐追尊玄元皇帝詔弘道元年王懸河行書

唐述聖紀文明元年武后撰中宗正書

盡得家風但微傷豐濃故有媿其父至於驚竒跳駿
不避危險則無異也書家論通比詢書失於瘦怯薛
純比詢書傷於肥鈍今視其書可信也廣川書跋
唐襄州刺史封公碑垂拱元年撰人姓名殘缺宋之
孫正書
右唐襄州刺史封公碑宋之孫書字畫頗佳之孫之
問弟也兄弟皆小人之孫奴事武三思三思五狗之
孫乃爾以此知書特小技何足貴哉金石錄
唐襄州孔子廟堂碑垂拱元年于敬之撰正書無姓
名
右唐襄州孔子廟堂碑于敬之撰其前題魯大司寇
贈太師宣尼父孔丘廟堂碑銘春秋之法或書字或

書名皆所以寓褒貶之意今敬之為孔子廟碑而斥
名何哉金石錄

唐武強縣令梁君德政碑垂拱元年撰人名缺劉玄
明正書
唐美原神泉詩序垂拱元年韋元且撰篆書無姓名
唐人都壇神君寶錄垂拱元年正書無書撰人姓名
唐奉先觀老君像碑垂拱元年李審幾撰沮渠智烈
書
唐會真法師紀德碑垂拱二年馮內直撰正書無姓
名
唐中山法果寺碑垂拱二年姚壽撰鞠處信正書
唐奉禮郎岑子輿墓誌垂拱三年弟義撰正書無姓
名
右唐岑子輿墓誌云君諱子輿字安道南陽棗陽人

也曾祖之象祖文本父曼倩梅元和姓纂及新唐書
宰相世系表載曼倩四子獻義仲翔仲休而無子興
今墓誌云次弟獻前太子典膳郎次弟義前成均監
主簿而無仲翔仲休墓誌既云獻義等則不載仲翔
仲休容有之惟子興乃曼倩長子姓纂與世系表當
書而闕者何也 金石錄

唐舍利塔銘 垂拱四年陳思順造正書無姓名

唐建興寺彌勒像碑 垂拱四年薛寶積撰行書無姓名

唐魏君碑 垂拱六年正書無書撰人姓名

唐介休令張君清德碑 詠昌元年李愿撰李敬八分書

偽周邛州刺史狄知遜碑 載初元年書撰人姓名殘

偽周乙速孤府君碑 載初元年苗仲容撰釋行滿書

偽周贈箕州刺史成公碑 天授二年楊炯撰正書無姓名

偽周祭玄元皇帝碑 天授二年行書無姓名

偽周化善寺石并碑 天授二年劉翊行書

偽周冠軍大將軍揚公碑 長壽元年蘇味道撰姪焚

偽周王仁恭祭嶽頌 長壽二年嚴浚撰序刊令均頌

偽周密州司馬康遂誠墓誌 行書無書撰人姓名

偽周醴泉縣令張仁蘊德政碑 長壽三年齊處仲撰

石唐醴泉縣令張仁蘊德政碑 長壽三年立醴泉尉

顏真卿書按魯公雖嘗為此官然在開元間而魯公以貞元元年為李希烈所害年七十六上距長壽三年實九十餘歲是時猶未生也又筆法與魯公他書不類以此疑有姓名同者然碑武后時立而不用當時所製字或云碑雖建於長壽中至魯公為尉重書而刻之未可知也據新史紀傳魯公以貞元元年被害年七十六而舊史德宗實錄皆云歿于興元元年七十疑新史誤金石錄

偽周冬官尚書李冲玄墓誌證聖元年姓名正書無書撰

偽周大德昉法師塔銘證聖元年武三思撰正書無姓名

偽周少林寺勅書萬歲二年八分書無姓名

偽周襄州靜真觀碑登封元年何彥先撰正書無姓名

偽周封祀壇碑登封元年武三思撰薛曜正書

偽周昇中述志碑登封元年武后撰相王旦正書

石周昇中述志碑武后自撰睿宗書碑極壯偉立於嵩山之巔其陰鍾紹京書字畫皆工妙政和中河南尹上言請碎其碑銘從之金石錄

偽周封中嶽碑登封元年李嶠撰相王旦正書又一碑類薛稷正書

石周武后封中嶽碑已殘缺書撰人名氏皆不可考然驗其筆蹟蓋薛書也金石錄

偽周南宮昌墓誌通天元年正書無書撰人姓名

偽周長安王簿龐君碑

神功元年行書無書撰人姓名

偽周杳冥君銘

神功元年正書無書撰人姓名

右杳冥君銘鳳閣舍人薛稷撰并正書此銘集古錄不載歐陽公蓋未之見趙氏金石錄雖列其目而云無書撰人姓名則亦不知其為稷也銘文但云悠悠洛邑眇眇伊壘又云靈蹟難訪莫知其狀則稷未嘗真知墓地蓋汎然而銘之耳後讀陳子昂集見其冥冥君墳記云皇帝因登緱山望少室尋古靈迹得王子晉之遺墟在永水之層曲欲開石室營壽宮庀方輿得古藏焉內有甃瓦長二丈二尺濶八尺中有古

劍一銅梳一瓦器二又有古五銖錢朱漆片及張撥之應手灰滅即具物備容還定舊壙哀其銘志磨滅姓位不顯乃錫之名曰冥冥君云觀子昂文則墳嘗發於武氏捨而錫之以名亦武氏也

金薤琳琅

偽周滑南令李君清德碑

聖曆元年馬吉甫撰正書無姓名

偽周昇僊太子碑

聖曆二年武后并行書

右周昇僊太子碑武后撰并書昇僊太子者王子晉也是時張易之昌宗兄弟方有寵諂諛者以昌宗為子晉後身故武后為葺其祠親銘而書君臣宣淫無耻類如此可發萬古之一笑也

金石錄

偽周護軍王君碑 聖曆二年行書無書撰人姓名

偽周永和故寺碑 聖曆二年僧仲英撰正書人名殘缺

偽周狷仁令鄭君紀德碑 聖曆三年李義仲撰正書無姓名

偽周潯陽縣文八像碑 聖曆三年行書無書撰人姓名

偽周明堂令干大猷碑 聖曆三年正書撰人姓名殘缺

偽周舍利寶函記 久視元年篆書無姓名

偽周流杯亭侍宴詩序 久視元年李嶠撰殷仲容正書碑陰記陸長源撰八分書

無姓名

偽周洛陽令鄭府君碑 久視元年薛稷撰并正書

右洛陽令鄭敞碑薛稷撰并正書碑額敞上世皆為

顯官而敞之為令綽有政績惜乎唐史無傳稷撰此碑在武氏久視元年故碑中之字如地作壘天作瓦人作王臣作忠國作罔授作蠶正作岳日作囧年作乖之類皆武氏所製故當時臣下用之非天子不考文此亦可見武氏僭竊之罪 金薤琳琅

偽周濮州長史蕭府君碑 大足元年員半干撰次子令臣正書

偽周許由廟碑 大足元年則天撰相王且正書

偽周福昌縣令張君清德頌 大足元年薛稷撰并正書

偽周閔居士夫人塔銘 大足元年正書無書撰人姓名

偽周懷州大雲寺碑 大足元年賈膺福撰并八分書碑陰記蕭懷素正書

石周二雲寺碑賈膺福撰并八分書其筆法精妙可喜按舊唐史云武后鑄九鼎圖寫山川物象命工書人賈膺福薛昌容李元振鍾紹京等分題之紹京之書世固多有膺福筆蹟雖僅存然世亦未有稱之者如昌容等書遂不復見以此知士所以自著于不朽者果在德而不在藝也

金石錄

偽周武士護碑

長安元年李嶠撰相王旦正書

右周武士護碑武后時追尊士護為無上孝明皇帝命李嶠為碑文相王旦書石焉戎幕閑談載李德裕言昔為太原從事見公牘中有文水縣牒稱武士護

墓碑元和年忽失龜頭所在碑上有武字凡十一處皆鐫去之碑高大非人力所及未幾武元衡遇害今此碑武字最多皆刻畫完好無訛缺者以此知小說所載事多荒誕不可信類如此

金石錄

偽周靜法師方墳碑

長安元年張嘉貞撰鐘紹京正書

偽周孝明皇后碑

長安二年武三思撰相王旦正書

偽周紀信碑

長安二年盧藏用撰并八分書

偽周司刑寺大脚跡勅

長安二年正書無姓名

偽周栖巖寺詩

長安二年高宗則天撰韓懷信正書

偽周稷山縣梁君孝義碑

長安三年李泰撰文八分書無姓名

偽周晉州長安韋公碑長安三年楊炯撰孫希弼八分書

偽周司刑寺佛跡碑長安三年前碑闕朝隱撰范元

八分書

偽周寇法師道德銘長安三年王道珪撰段元述正書

偽周都官郎中孔昌寓碑長安三年盧藏用撰并八分書

右周孔昌寓碑載其世系甚詳云宣尼父三十六世

孫也十四世祖濬吳侍郎生晉豫章守竺竺生大尚

書冲冲生大司農侃侃生秘書監滔滔生江夏太守

俟俟生宋尚書左丞幼幼生尚書右丞遙之遙之生

中書侍郎焯焯生齊散騎常侍珮珮生梁侍中休源

休源生陳黃門侍郎宗範宗範生陳散騎常侍伯魚

伯魚生隋秘書正字德紹德紹生昌寓唐以前士人

以族姓為重故雖更千百年歷數十世皆可攷究自

唐末五代之亂在朝者皆武夫悍卒於是譜牒散失

士大夫茫然不知其族系之所自出豈不可惜也哉

按此碑及梁史皆云休源冲八世孫而姓纂獨以為

七代孫誤矣金石錄

偽周房州刺史崔敬嗣墓誌長安三年行書無書撰人姓名

集古錄曰崔為唐名族而敬嗣不顯余考之唐有兩

崔敬嗣昔中宗放房州吏多肆慢不為禮敬嗣為刺

史獨盡誠推奉中宗復位有與敬嗣同姓名者每擬
官輒超拜召見悟非是訪真敬嗣死矣即授子汪五
品汪生光遠嘗持節荆襄徙鳳翔又節度劍南其官
職甚顯敬嗣亦以此名於世昔人偶不考也廣川書跋
右崔敬嗣墓誌云祖咸考表而元和姓纂以咸為誠
表為儀表又新唐書崔光遠傳祖敬嗣為房州刺史
獨盡誠推奉中宗後授其子汪五品官汪生光遠今
以墓誌考之敬嗣武后時實為房州刺史然墓誌載
敬嗣長子悅次子協而無名汪者姓纂亦云悅生光
遠然則以悅為汪蓋史誤也敬嗣卒證聖元年中宗

反正其歿已久屢遷他人官而不悟可謂昏矣

金石錄

偽周思簡律師塔銘

長安四年正書無書撰人姓名

偽周辛間居寺詩

長安四年高宗睿宗太平公主詩八分書無姓名

偽周東鎮沂山場

長安四年房晉撰韓景陽八分書

偽周石柱銘

裴談撰八分書無姓名

偽周幽林思

韓覃撰正書無姓名

偽周整法師龍門石龕像碑

僧波崙撰表元愆正書

偽周游仙篇

武后撰薛曜正書

偽周信行禪師碑

越王貞撰張廷珪八分書

偽周宴石淙序并詩

諸公撰薛曜正書

偽周堯廟碑 盧永慶撰 劉濟物正書

偽周允武皇帝碑 正書無書撰人姓名以上碑皆武

唐通池縣宗人為高宗造像碑 神龍元年武后撰 武三思正書

唐福先寺浮圖碑 神龍元年中宗撰 相王且正書

唐龍興聖教序 神龍元年史燾撰 釋曠正書

唐益州學館廟堂記 神龍元年子欽明撰 正書姓名殘缺

唐祝府君碑 神龍元年子欽明撰 正書姓名殘缺

右唐祝府君碑府君諱緄欽明父也碑欽明自撰今南京有漢祝睦兩碑其一言君兆自黎辛祝融苗胃其一言其先高辛余按諸書重黎祝融皆帝高陽之

後帝堯高辛之子也睦碑既云出於重黎祝融又云出於高辛自相牴牾莫可窮究而此碑引世本氏姓篇云祝氏軒轅之後也史記周本紀武王克殷封黃帝之後於祝帝堯之後於薊樂記云封黃帝之後於薊帝堯之後於祝蓋以黃堯末下缺同出有熊由此史傳相交祝薊去舉參考世本馬遷近之然史記於族系多采世本不知世本果可盡信否 金石錄 唐秦州都督唐宗碑 神龍二年岑義撰 族孫從心正書 石唐唐宗碑云君諱宗字微仁而唐書宰相世系表云名世宗碑又云祖諱子政而世系表作二政皆當

以碑為正宗宰相休璟祖也仕隋為朔方郡丞行郡
守事大業末為賊梁師都所殺神龍中贈州都督石
錄

唐懷寧縣令慕容府君碑

神龍二年徐堅撰正書無
姓名

唐沙州司馬楊榮碑

神龍二年元伯儀撰章句八分
書

唐衛州司馬楊恪碑

神龍二年張柬之撰八分書姓
名殘缺

唐信行禪師碑

神龍二年越王貞撰薛稷正書

唐崔仁縱碑

神龍二年正書無書撰人姓名

唐工部尚書姚壽碑

神龍二年正書書撰人姓名殘
缺

右唐姚璿碑按新唐書璿列傳云為夏官侍郎坐族

弟敬節叛貶桂州長史而碑云自兵部侍郎以敬節
犯法改授司府少卿檢校定州刺史尋即轉都督廣
循等二十三州諸軍事廣州刺史後替還仍以前累
重貶桂州又璿為宰相時嘗為西京留守而史不載
璿以妓妾蒞諛事武后其事蹟皆不足取而於官秩
闕漏不可不記者所以正史官之失也璿微時所歷
官列傳尤簡略今皆不復載云 金石錄
唐立後周宇文舉碑 神龍二年盧思道撰楊畧正書
右後周宇文舉碑盧思道撰神龍中其曾孫故追建
以後周書攷之官闕事迹多同惟碑云公諱舉字神

舉而史言名神舉又史云其曾祖名求男而碑止言
名求史云祖名顯和而碑止言名和亦皆不同其卒
也史云宣帝以宿憾殺之而碑稱遭疾薨疑作碑者
為諱其事當以史為正 金石錄

唐魏叔瑜妻王夫人墓誌

神龍二年無撰人姓名子
華正書

右唐王夫人墓誌夫人魏叔瑜妻華之母也誌無書

撰人姓名驗其筆法蓋華自書華以草隸擅名一時

然石刻見于今絕少此誌世尤罕傳云 金石錄

唐王仲詳等造像碑

神龍三年正書無書撰人姓名

唐葉縣令宋君遺愛頌

神龍三年吳師道撰正書無
姓名

唐兵部侍郎崔兢墓誌

神龍三年正書無書撰人姓
名

右唐崔兢墓誌云公諱兢字明慎祖敦禮父守業按

舊唐書敦禮列傳云孫真慎神龍初為兵部侍郎元

和姓纂新史宰相世系表所書亦同今以墓誌考之

其家世及名位皆合惟不著其名而以明為貞者皆

唐史及姓纂之闕誤也

金石錄

唐中興聖教序碑

神龍三年中宗撰唐奉一八分書

右唐中興聖教序中宗為三藏法師義淨所作唐奉

一書刻石在濟南長清縣界四禪寺寺在深山中義

淨真身塔尚存余屢往游焉得此文入錄案御史臺

記奉一齊州人善書翰武后時為御史後生誅爾皇族廢金石錄

唐聖教序碑側

右唐聖教序碑側云則天嘗得玉冊上有銘十二字朝野不能識義淨能讀其文曰天冊神皇萬歲忠輔聖母長安證聖元年五月上之詔書褒合梅宋莒公紀年通譜武后以證聖元年九月授天冊金輪聖神之號故大赦改元先是司隸局人於水際得石函有玉冊云神皇萬歲忠輔聖母長安故改元協瑞其文與義淨所載小異云金石錄

唐徐有功碑景龍二年徐彥伯撰正書姓名殘缺

右唐徐有功碑徐彥伯撰以新舊唐史考之其本末皆同惟舊史云長安二年卒年六十二碑云三年卒年六十八新史亦年六十八與碑合金石錄

唐句容令岑公德政碑景龍二年張景毓撰釋翹微正書

唐孔子贊景龍二年撰人姓名殘缺武盡禮正書

唐太子中舍人楊承源碑景龍二年王獻忠撰集王義之歐陽詢褚遂良等真

唐洛陽尉馬克忠碑景龍三年張說撰盧藏用八分行書

唐寧照寺鐘銘景龍三年武承泰撰武盡禮正書

唐騎都尉劉君墓誌 景龍三年正書無書撰人姓名

唐國子祭酒武承規墓誌 景龍三年蘇頌撰顏叔堅正書

右唐武承規墓誌蘇頌撰顏魯公家廟碑載魯公之

父名惟貞字叔堅嘗為太子文學今此誌題太子文

學顏叔堅書豈非以字行乎家廟碑又稱叔堅受筆

注於舅殷仲容氏特以草隸擅名云 合石錄

唐杭州龍興寺碑 景龍四年盧李珣撰李涉八分書

唐龍興寺碑 景龍四年張說撰盧藏用八分書

唐白鶴觀碑 八分書無書撰人姓名

唐天竺寺碑 景雲元年蘇頌撰蘇說八分書

唐蘇瓌碑 景雲元年盧藏用撰并八分書

唐王陰二真君碑 景雲二年薛稷一撰正書無姓名又李虎之撰施楚王正書又李吉甫撰備伯

唐勝業寺雙彌勒像碑 景雲二年褚遂良撰趙冬曦正書

唐景龍觀鐘銘 景雲二年睿宗撰正書無姓名

唐王思泰碑 景雲二年李振撰并正書

唐大雲寺石燈臺頌 景雲二年景初陽撰殷子陽八分書

唐陝州刺史劉延景碑 景雲二年徐彦伯撰張庭珪八分書

右唐劉延景碑延景文為睿宗妃生讓帝者碑云夫

人房氏以景雲元年贈沛國夫人二年歲次丁亥祔

寔于延景之墓按睿宗以景雲元年六月即位改元
歲次庚戌明午歲在辛亥而碑作丁亥誤也碑載延
景四子溫玉承顏璵琪而元和姓纂以璵為瑗蓋姓
纂之謬 金石錄

唐王美暢碑 景雲二年薛稷撰并正書

唐洛州長史盧公善政頌 景雲二年撰人姓名殘缺
蘇說八分書

唐修封禪壇記 景雲二年賈膺福撰并正書

右唐修封禪壇記賈膺福書初予德膺福八分書大
雲寺記愛其筆法後又得此記字為小楷尤工妙可
喜云 金石錄

唐并州長史崔敬嗣碑 景雲二年胡皓撰郭謙光八
分書

右唐崔敬嗣碑按唐史崔光遠傳云云余集錄有光
遠祖墓誌其卒在武后朝此碑敬嗣蓋中宗時誤遷

官者也而碑乃云景龍元年有制追不時至中宗對
宰相稱其姓名三令使者趣之及謁見即日拜羽林
將軍二說不同豈中宗既召見乃悟其非是歟 金石

唐玄通居士張萬迴墓誌 大極元年崔湜撰正書無
姓名

唐同州河瀆紀瑞頌 先天元年崔禹錫撰王崇敬八
分書

唐司農卿盧萬石碑 先天元年李義撰八分書無姓
名

唐楊軌緒碑 先天元年褚璿撰權瓌八分書

唐荆王神祠記

先天二年正書無書撰人姓名

唐元公浮圖祠堂碑

先天二年八分書無書撰人姓名

唐中書舍人王無競碑

姚訥撰行書無姓名

右唐王無競碑無競事迹附見唐書陳子昂傳後以碑考傳頗不合傳言自殿中侍御史徙太子舍人神龍初出為蘇州司馬貶廣州仇家矯制殺之而碑言為中書舍人卒傳言生與張易之等交往貶而碑云兩張弄權九有蕩析公黜而無愠皆莫知其孰是據碑言無競無子孫權知萊州刺史姚訥為買石立碑去無競之歿已遠事得于傳聞未足盡信也無競

東萊人墓在掖縣界中云

金石錄

唐道善寺大像碑

開元元年羅逸撰行書無姓名

唐贈右僕射王洎碑

開元二年盧藏用撰甘獻誠八分書

右唐王洎碑洎王仁皎父也元和姓纂唐書宰相世系表皆云名文洎而碑云名洎字文洎云

金石錄

唐安樂府典軍田孝胤碑

開元二年王激撰正書無姓名

唐南亭記

開元二年王翼撰八分書無姓名

唐辨穢法師塔銘

開元二年趙冬曦撰正書無姓名

唐韋公夫人王氏墓誌

開元二年正書無書撰人姓名

唐尹孝子妻韋夫人墓誌

開元二年正書無書撰人姓名

唐襄州編學寺禪院碑開元二年章承慶撰紹京

襄州編學寺禪院碑黃門侍郎修國史章元慶撰太

子少詹事陞紹京書開元二年立其文云襄州人將

仕郎阮弘靜與其屬人建編學寺禪院故立此碑承

慶有辭學張易之敗時承慶以附託方待罪衆推令

草赦書承慶援筆而成衆壯之紹京景龍中以苑總

監從討韋氏有功惟嗜書家藏王羲之獻之褚遂良

書至數十百卷以善書直鳳閣武后時榜諸宮殿明

堂及銘九鼎皆紹京書也其字畫妍媚道勁有法誠

少與為比然今所見特此碑尚完尤為可愛也編學

寺於宇文周為常樂寺於今為開元寺

唐少林寺戒壇銘開元三年三藏法師義淨撰張傑

唐睦州龍興寺碑開元三年唐希銳撰徐嶠之正書

唐杭州刺史裴倦碑開元三年族子餘撰并行書

唐雋州都督姚懿碑開元三年胡皓撰徐嶠之正書

右唐姚懿碑懿崇父也據碑及唐書宰相世系表皆

云公諱懿字善意而崇子奕碑與元和姓纂乃云名

善意豈非以字行乎懿隋末唐初人仕至雋州都督

開元間崇為宰相立此碑金石錄

唐汾陰后土祠銘開元四年胡愔撰并八分書

唐建福寺三門碑

開元五年盧藏用撰集王右軍行書

唐有道先生葉公碑

開元五年李邕撰并行書

唐杯渡師墓石柱頌

開元五年盧若虛撰盧重玄八分書

唐光祿少卿姚彝碑

開元五年撰人姓名殘缺徐嶠正書

唐贈歙州刺史葉惠明碑

開元五年韓擇木撰并八分書

唐宰相盧懷慎碑

開元五年蘇頲撰明皇八分書

右唐盧懷慎碑蘇頲撰其敘懷慎官闕甚略云公諱懷慎字懷慎而史不載其字又云上因遊鄂杜北望京闕蔚然有公之別廬抵其宅室甚陋據此所書乃明皇嘗親幸其第而史云馳使問之非也史云懷慎

屬疾宋璟盧從愿候之臨別執二人手曰上求治切

然享國久稍勸于勤將有儉人乘間而進矣蓋謂楊

李也然獨新史有之舊史不載按懷慎以開元四年

卒是時明皇新即位乃曰享國久倦于勤何哉疑初

無此事蓋唐史喜取小說多謬誤云

金石錄

唐琅琊王冲墓誌

開元六年正書無書撰人姓名

右唐琅琊王冲墓誌冲越王貞子也中宗遷房陵貞

與冲謀反正舉兵未幾父子皆敗開元六年始詔陪

葬昭陵

金石錄

唐陳延喜妻穆氏墓誌

開元六年齊望之撰蕭元皓正書

唐懷素律師碑 開元六年崔融撰僧行敦集正書

唐陽元琰碑 開元六年崔沔撰梁昇卿八分書

唐豫州刺史魏叔瑜碑 開元六年張說撰于華正書

唐鄭國夫人鄭氏碑 開元六年崔日用撰徐嶠之正書

唐太子少傅竇希瑊碑 開元六年李湛然撰魏華正書

唐蘇氏造觀音像碑 開元六年李畬撰劉升八分書

唐中嶽韓先生碑 開元六年崔彘本撰司馬綸八分書

唐唐興寺碑 開元六年許景先撰無書人姓名

右唐唐興寺碑殿中侍御史許景先撰寺在山西聞喜縣縣令于光庭之在聞喜不聞其有善政而乃汲

汲為僧移寺非賢令也 金薤琳琅

唐鬱林觀東岳壁記 開元七年崔逸文八分書無姓名

唐永豐陂堰頌 開元七年徐嶠之撰并八分書

唐善達法師碑 開元七年郭庭誨撰正書無姓名

唐于知微碑 開元七年姚崇撰正書無姓名

唐益州府學孔子廟堂碑 開元七年周顥撰正書姓名殘缺

唐造文翁高朕像記 開元七年周顥撰胡履虛八分書

唐徐州刺史蘇誦碑 開元七年裴耀卿撰劉升八分書

唐孔子廟碑 開元七年李邕撰張庭珪八分書

唐玄元觀尹尊師碑 開元八年裴子餘撰郭謙光八分書

右唐尹尊師碑郭謙光八分書謙光八分初不見稱
于唐人獨歐陽公盛稱之以謂不減韓蔡史李四家
余因訪求久得崔敬嗣及此碑著錄焉金石錄

唐李思訓碑

開元八年李邕撰并行書

唐嘉禾寺禪院碑

開元八年徐楚璧撰姚思義八分書

唐高士楊府君墓誌

開元八年行書無書撰人姓名

唐懷州刺史陶大舉碑

開元八年姚崇撰徐嶠之正書

唐河侯新祠頌

開元九年秦宗撰王晏行書

右唐河侯新祠頌秦宗撰云河伯姓馮名夷字公子
潼鄉華陰人也按章懷太子張衡傳注引聖賢冢墓

記亦云馮夷者弘農華陰潼鄉隄首里人服八石得
水仙為河伯又引龍魚河圖曰河伯姓呂名公子夫
人姓馮名夷三說雖異然其為無稽則同也金石錄

唐北嶽府君碑

開元九年韋虛心撰陳懷志行書

唐侍御史王瑜墓誌

開元九年八分書無書撰人姓名

唐遂城令康府君碑

開元九年沈淮南撰徐浩正書

唐陳昭題名

開元九年

河南石氏得唐陳昭題名制度大備知今日進士刻
石甚陋段成式曰慈恩寺題名自張苔於寺中題其
同年人因為故事柳氏序訓又謂韋肇初及第偶於

慈恩寺塔下題名後進慕效之按苔登科在天寶十三載陳昭所書在開元九年封氏記神龍以來杏園宴後慈恩塔下題名同年中推善書者紀之他時有將相朱書之及第後知間或遇未及第時題名則爲添前字故李紵不加前字到老恨焉則題名自神龍初有之矣柳氏著書在中和三年方會昌中陳商知舉奏對不稱改命王起主文宣旨停曲江大會及題名局席至中和而後進士復題名慈恩則自廢而復行嘗聞唐人言柳宗元劉禹錫題名慈恩寺談元茂秉筆不欲名字著□目神縱版子者率多不達柳暗

斟酌之馬徵郡文佐盡著版子而宗元竟不達雖一時爲戲然德器自可於此見之題名之盛亦一時所

尚雖至今不廢但隆殺異爾

廣川書跋

唐兗州刺史韋府君遺愛頌

開元十年狄光嗣撰張庭珪正書

唐萬回法師碑

開元十年徐堅撰行書無姓名

唐郭知運碑

開元十年蘇頲撰魏華正書又一碑張說撰梁升卿八分書

右唐郭知運碑蘇頲撰知運有兩碑其一張說文唐書知運傳載其子二人曰英傑英乂而蘇張二公所爲碑書其子四人曰英傑英竒英協英彥而無英乂歐陽公疑焉以謂英竒等三子在唐不顯史家闕漏

尚或有之英又嘗為西川節度使其事甚著史官不應差其世家而蘇張二公作銘在知運卒後不遠亦不應闕其子孫余按代宗實錄云英又知運季子而元載所為英又墓碑亦云隴右節度使知運公之皇考也然則英又為知運子無疑又按英又碑云公以天寶二載筮仕蓋知運以開元九年卒明年立碑碑所載諸子皆以有名位英又幼未從仕故不載爾余又嘗得徐浩所為英傑碑有云移孝於忠二葉四將齊名當代同氣十人然則知運諸子碑傳闕漏者尚多不獨此三人而已

德宗實錄又有郭英幹云英又弟也金石錄

唐萊州刺史干府君碑

開元十年撰人姓缺沙門重

唐狄梁公生祠記

開元十年李邕撰張庭珪八分書

唐吳季子廟碑

開元十年八分書書撰人姓名殘缺

唐右庶子干府君碑

開元十年姪孺卿撰沙門重

唐御史臺精舍碑

開元十一年崔湜撰梁昇卿八分

御史臺精舍記唐中書令崔湜撰劉昇卿八分書漢承秦制御史為丞相貳其後以寺隸之然立精舍以居書傳所見最先包東海立精舍教授在西漢末顧湜謂此佛之所舍昔漢處摩騰洛陽西建精舍為始誤也按釋書以靜居為精舍致一為精不使雜也

古之齋心服形其居必有可默存者今人猶闢屋爲齋謂如齋戒以守獨不可以精舍名乎蕭摹之請興塔寺精舍詣二千石庾子輿造佛寺因立精舍嶺南原明僧紹住弇榆山栖雲精舍此皆諸梵所居然書生立學昔傳此名豈致道之所惟精一得之邪昔魏武嘗曰譙東五里卜築精舍秋夏讀書其後徐度折節學問精舍唐僧淵立精舍豫章阮孝緒以一鹿車爲精舍徐伯珍立精舍祛蒙山陳寔立精舍講授張郡戴顓立黃鵠山竹林精舍張漢直其弟出精舍數里遇之伯珍蒙山立精舍則古人於其居以名自警

思致其精也後世便以爲精舍皆寺湜之嗜利茂學其可責以此哉

廣川書跋

